



Onur ad in bajetg puril grischun

Marca Pro Patria 2012 mussa in «crot» puschlavin

■ (gsc) Ils 9 da matg 2012 edescha la Pro Patria (Turitg) quatter marcas postalas cun supplement, da la graficra Bernadette Baltis, en la seria «Bajetgs pitschens». Ina da 1.00 + 0.50 francs represchenta in «crot» da Brüschi, construcziun circulara da mir setg, pia fabricada senza maula. Ils craps quaders èn in pau inclinads per impedir la plievgia da penetrar en l'edifiz; sisum mettev'ins ina platta-crap. Ils purs puschlavins duvravan ils «crots» cunzunt per conservar il latg sin acla u sin alp ad ina temperatura da 4°–5°, grazia a l'aua che curriva tras il bajetg. Giu en la vallada duvrav'ins «crots» era per products agriculs, schizunt sco cuschinas u abitaziuns temporaras. Il pled «crot» deriva d'in pled grec antic ch'il latin tardiv ha surpiglià sco «crupta» («tschaler»). Spe-

zialists da plis pajais renconuschan la remartgabla atgnadad da lezs bajetgs. Il Fond per la cuntrada svizra ha sustegnì il project d'als mantegnair, ensemèn cun il chantun, la Pro Patria, la vischnanca da Brüschi e schizunt quellas da Schlarigna e Silvaplauna. La glieud da Brüschi è losscha che la Pro Patria ha tschernì lez bajetg excepziunal per ina marca postala. L'uniun «Casa Besta» (arianna.nussio@pgi.ch) ed il «Circolo Filatelico Poschiavo» (Loretta Cortesi, S. Antonio 617B, 7745 Li Curt) envidan a la preschenta-ziun festiva da la marca nova mardi, ils 15 da matg a las 17.30 en la «Casa Besta» da Brüschi, cun las personalitads suan-dantas:

– Bernadette Baltis, l'artista che ha creà la marca;

– Roman Schönauer, secretari general da la Pro Patria;
– Dante Peduzzi dal Cussegl da funda-ziun da la Pro Patria;
– deputà Mario Monigatti (Brüschi), isto-riker, cun in film davart l'erecziun d'in «crot».

L'autra marca 2012 da 1.00 + 0.50 francs represchenta in pavigliun da la Villa Abendstern a Wädenswil/ZH, descrit da Robert Walser (1878–1956) en ses roman «Der Gehülfe». Ina marca da 0.85 + 0.40 francs represchenta in vegl graner da laina a Mézières/VD e vegn preschentada là en ina festa multifara ils 9 da matg da las 11.30 a las 18.00. L'autra marca da 0.85 + 0.40 francs mussa il Bügl dal liun (1792) en la residenza da champagna d'Eichberg ad Uetendorf/BE.